



# LINYON

Piblikasyon Linyon Demokratik Seselwa

Vol. 3

No. 6

Le 20 Out, 2018

## LDS i lo Konsey Rezyonal pour servi zabitan

**L**DS in nonm manm lo Konsey Rezyonal ki'n formen anba Minister Gouvernman Lokal koman en mwayen pour servi bann zabitan distrik.

Premye responsabilite sa bann Konsey se pour regard bann problem ki ekziste dan distrik e anmenn en solisyon. Sa Konsey pou annan responsabilite sirvey travay bann Ladministrasyon distrik.

Premye rezilta ki LDS i anvi war, se pour tir viktimizasyon e lentimidasyon dan travay Ladministrasyon Distrik.

Tou dimoun dan Sesel i konn zistwar Ladministrasyon Distrik. Ler zot ti ganny formen, bann Administrater Distrik ti bezwen manm Parti SPPF. Kanmenm zot ti en biro Gouvernman anba Minister Gouvernman Lokal, bann biro distrik in toultan servi osi koman en lorganisyon politik SPPF e apre Parti Lepep. Sa ti fer ki ti annan diskriminasyon e viktimizasyon. Ler ti ariv eleksyon, bann Administrater Distrik ti



souvan mars avek bann kandida SPPF/Parti Lepep e fer kanpanny pour zot dan zot travay.

Afilyasyon politik ti fer ki bokou dimoun pa ti al dan biro Ladministrasyon. Akoz sa, en biro gouvernman pa ti pe ganny servi byen.

Premye lefe Konsey Rezyonal se ki sa pou arete. Nou oule ki Ladministrasyon Distrik i ouver pour tou dimoun. Bann manm Konsey pou pran responsabilite pour zot rankontre dimoun dan zot distrik. Zot pou ganny siporte dan sa travay par bann Manm Lasanble.

### MANM LDS LO BANN KONSEY REZYONAL

#### Konsey Rezyonal Nor

Bryan Julie (Bel Ombre)  
Kenny Francoise (Beau Vallon)  
Karine Ernesta (Glacis)  
Claudette Adela (Anse Etoile)

#### Konsey Rezyonal Santral 1

Beryl Valentin (St.Louis)  
Marie-Helene Niole (Mont Buxton)  
Yvonne Barbe (English River)  
*Pou ganny nonmen* (Bel Air)

#### Konsey Rezyonal Santral 2

Michel Roucou (Mont Fleuri)  
Richard Labrosse (Plaisance)  
Paqlina Moustache (Les Mamelles)  
Albert Napier (Roche Caiman)

#### Konsey Rezyonal Est

Jean-Marc Fostel (Cascade)  
Rosie Bistoquet (Pointe Larue)  
Lucianna Adrienne (Anse Au Pins)

#### Konsey Rezyonal Sid

Alain Theresine (Au Cap)  
Noella Ernesta (Au Cap)  
Aaron Bonnelame (Anse Royale)  
Dave Bristol (Takamaka)

#### Konsey Rezyonal Was

Godfra Hermitte (Port Glaud)  
Yvonne Azemia (Grand A. Mahe)  
Rose-Arlette Dodin (Anse Boileau)  
Jeff Con fiance (Baie Lazare)

#### Konsey Rezyonal Zil Pros

Jane Rath (Grand A. Praslin)  
Mike Cedras (Baie Ste. Anne)  
Loncey Micoock (La Digue)

## KONVANSYON LDS 2018

### KONVANSYON LDS POU FER LE 5 OUT 2018

Nou apel tou lafanmir LDS pou pran par dan nou konvansyon anyel ki pou fer le 5 Out 2018 dan Sant Konferans ICCS, aparti 2.00 er apre midi.

Ansanm, dirizan e manm pou tras larout pour LDS form Gouvernman pour nou pei demen.

Sa rankont pou donn loportinite pour bann dirizan adres bann manm lo travay ki nou'n fer e sa ki pe vini devan nou. Bann manm e siporter osi pou nobou pran laparol e met zot sizesyon pour travay LDS ver en bon

lavenir pour Sesel.

Si ou dan LDS, fodre ou partisipe. I pou osi lokazyon kot tou manm i kapab renouvle zot anrezistreman e si ou anvi anrezistre, ou kapab fer li sa zour menm.

Pou annan transpor bis pour tou dimoun ki bezwen pour al konvansyon e retournen. Zis kontakte ou MNA obyen Repezantan LDS dan ou distrik pour laranzman.

Ou kapab osi telefonn nou biro (4321122) pour lasistans.

**PRAN PAR DAN TRAS LAVENIR OU PARTI POLITIK. ANNOU FER LI ANSANM.**

# Lanket pou komanse dan COSPROH

**A**pre demann Lasanble Nasyonal, en komisyon inn ganny kree pou fer en lanket dan bann zafer COSPROH. Lasanble, dan mosyon prezante par Onorab Sandy Arissol, ti demann Prezidan Danny Faure pou etabli sa komisyon. I en demann ki Msye Faure in alsepte e in nonm manm pou sa komisyon.

Nou prezan demande ki sa bann dimoun ki form sa komisyon i fer zot travay seryezman e a fon. I annan en pe mefyans lo sa bann manm akoz zot tou zot sorti dan gouvrenman. Me sa i en latas kot zot bezwen endepandan. Lepep Seselwa in soke par bann revelasyon lo COSPROH ki'n ganny fer deza dan Lasanble. Zot anvi prezan konn tou laverite. E si I annan koripsyon kinn arrive, ki bann byen nou pei I ganny retourneren e sa a benefisyè pep Seselwa.

Sa komisyon i en lekzanp lafason ki gouvrenman i kapab pran aksyon lo sa bann size ki ganny met deor par Lasanble Nasyonal. Lasanble limenm i napa pouvwar pour etabli sa bann komisyon, e i bezwen kont lo lekzekitiv dirize par Prezidan pour anmenn sa bann size pli devan.

Lasanble in a plizyer repriz demann Prezidan pou pran aksyon lo size enportan ki in leve. En tel demand sete pour reform lafason ki STC i fer son biznes, par koup bann 'middlemen' ki i fer biznes avek, e osi pou aret pey Parti Lepep lokasyon R800,00 pour en langar.

COSPROH i enn sa bann lakonpani leta ki ti tenir plizyer propriyete enkli serten gran lotel pour Gouvrenman. Se sirtou bann tranzaksyon ki enplik Msye Mukesh Valabhji ki'n ganny devwale dan Lasanble.

## SIPOR POUR DIMOUN EK DEZABILITE



**A**nkore enn fwa LDS in demonstre ki dan Lasanble Nasyonal nou annan zentere tou dimoun a ker e ler nou met en mosyon devan nou fer li pou ed tou kous popilasyon. Nou pa zis kler tors osi lo koripsyon ek labi me nou osi anmenm en laklerte pour bann dimoun mwen vilnerab tel ki bann ki pe viv avek en dezabilite.

Mosyon, prezante par MNA pour Glacis Regina Alcindor, ti pe demande ki Gouvrenman I konstri en sant pou dezabilite kot tou bann zanf ki ne ek en dezabilite a ganny sans grandi dan en landrwa ki apropiye. Sa sant i a permet dimoun avek dezabilite devlop zot talan ek abilite pour ki zot a kapab vinn bann profesyonel demen e antre dan en lanplwa ki konvenab pour zot.

I enportan note ki pandan 5em Lasanble Nasyonal, ki ti konpri selman reprezantan Parti Lepep, en mosyon ti ganny pase lo zentere bann dezabilite, me ziska ozordi nanryen pa'nn ganny fer pou sa bann dimoun. Nou demande alors ki sa fwa si, Prezidan Faure I decide pran aksyon pou ki sa sant a vinn operasyonel. Nou demann Prezidan Faure, e osi lezot sitwayen, pou silvouple get abilite tou nou bann dimoun. Annou war posibilite e non pa bloke lo dezabilite.

## Bal Kreol

### Au Cap LDS

*July 27th, 2018 from 9.00 pm to 2.00 am*

**Asian Fusion Restaurant**

**Entrance R200, Bar Cash**

## KONVANSYON LDS

**Le 5 Out, 2018**

**Dan Sant Konferans Enternasyonal, Victoria  
aparti 2.00 er apremidi**

**Si ou dan LDS, pa manke!**

## Anse Aux Pins Mass Sport

**Dimans le 22 Zilyet, aparti 10 er bomaten**

**Kontakte Biro MNA pour plis lenformasyon**

**Tel. 2643478, St Michel Complex**